

Ҳидоятдан сўнг залолатга кетган киши яна тавба қилиши мумкинми?

20:41 / 24.04.2016 3429

Сизга саволларим жуда кўп, қимматбаҳо вақтингизни кўп олмаслик учун қисқароқ ёзишга ҳаракат қиламан. Аллоҳ илмингизни янада зиёда этсин, ҳақ йўлда собитқадам қилсин, ёзган китобларингизнинг ҳар бир ҳарфига тоғлар катталигича ажру-савоблар берсин, биздек омиларнинг бахтига тану-жонингизни саломат қилсин. Омийн!

Эрим ва унинг оиласи динсиз, намоз-рўза йўқ, ичишади, чекишади ва ҳоказо, ҳатто бириси: «Охират йўқ», деган (астаффируллоҳ). Йилига 2 марта (ҳайитларда) қабристонга чиқишни, одам ўлгандан кейин уч, етти, пайшанбалик, қирқ каби маросимларни қилишни «дин» деб тушунадилар. Ўзим исломга кирганимга уч йил бўлди. Турмуш қурганимда ўзим ҳам «замонавий»лардан эдим, Ҳодий Эгам иккинчи марта имкон берди.

Оилада 3 фарзанд эдик, 14-15 ёшларда эдим, онам ўлган, отам кўп ичар эди. Бизни эса Аллоҳ ҳидоят этди, учаламиз намоз ўқир эдик, «Иймон» китобингиз биринчи ўқиган китобимиз эди, бир-биримизга меҳрибон эдик. Кейин укам чет элга ўқишга кетди, мен университетга кирдим, кичик укам дадам ёнида қолди, учаламиз ҳам динсиз муҳитга тушиб қолдик, бир-биримиздан айрилиб, диндан чиқиб кетдик.

Аллоҳ тавбамни қабул қилармикин? Иймоним суст, ҳатто, баъзан шундай ёмон гумонлар бўладики, айтишга ҳам қўрқаман, оиламнинг динга қаршилиги дард устига дард.

ЖАВОБ: Бисмиллаҳир Роҳманир Роҳийм

Муҳтарама Интизор Бахтиёр қизи хоним афанди!

Ўзингиз айтиб ўтганингиздек, тавбага имкон берган Аллоҳнинг Ўзига ҳамду санолар бўлсин!

Ибн Умар розияллоҳу анҳудан ривоят қилинади:

«Набий соллаллоҳу алайҳи васаллам:

«Албатта, Аллоҳ банданинг тавбасини, модомики, у ғарғара ҳолига бориб қолмаган бўлса, қабул қилади», – дедилар».

Термизий, Аҳмад ва Ҳоким ривоят қилишган.

Жон ҳалқумга келмасдан аввал тавба қилиб қолмоқ лозим. Ана шу соатгача тавба эшиги очиқ. Ундан кейин кеч бўлади.

Ҳақиқатни англаб, ҳидоятнинг ҳузурбахш нурларидан баҳраманд бўлгандан кейин яна залолатга, ғафлатга кетиш яхшимас. Энди, чин дилдан надомат қилиб, аввалги ҳолатларни такрорламасликка ҳаракатда бўлинг. Ибодатларни ўз вақтида адо этиб, Аллоҳнинг зикрини кўпроқ қилинг. Аллоҳдан тўғри йўлда собит қилишини сўраб дуою илтижода бўлинг.

Гумонлардан узоқ бўлинг, уларни тилингизга чиқарманг. Илм ўрганишга ҳаракат қилинг. Аллоҳ таолонинг раҳматидан ноумид бўлманг. Зеро, Аллоҳнинг раҳматидан фақат шайтон ва унга эргашганларгина ноумид бўлур. Валлоҳу аълам.